

## Awadhi - Agape - God's Love Letter Scriptures

यूहन्ना 15:9 “जइसे परमपिता मोसे पिरम करे बाटइ, मई भी तोहसे बइसे पिरम करे अही। मोरे पिरम में बना रहा।

यसायाह 43:1 याकूब, तोहका यहोवा बनाए रहा। इस्राएल, तोहार रचना यहोवा किहे रहा। अब यहोवा कहत ह: “भयभीत जिन ह्वा! मई तोहका बचाइ लिहेऊँ। मई तोहका नाउँ स पुकारेऊँ हा तू मोर अहा।

यिर्मयाह 1:5 “तोहरी महतारी क गरभ में रखइ क पहिले मई तोहका जान लिहेऊँ। तोहरे जनम लेइ क पहिले, मई तोहका बिसेस कारज बरे चुने रहेऊँ। मई तोहका गस्टून क नबी होइ क चुने रहेऊँ।”

यूहन्ना 15:16 “तू मोका नाही चुने रखा, मई खुदइ तोहका चुने रहेऊँ अउर इ निश्चय करे अही कि तू जा अउर सफल होइ जा। मई चाहित ह कि तोहका सफलता मिलइ, अउर मोरे नाउँ स जउन कछू तू चाहा परमपिता तोहका दर्ई देइ।

3 यूहन्ना 1:2 मोर पिआरे बन्धु, मई पराथना करत अहँ कि तू जइसेन आध्यात्मिक रूप स उन्नति करत अहा, वइसेन तू सब बातन में उन्नति करत रहा अउर स्वस्थ रहा।

यसायाह 43:4 तू मोरे बरे बहोत महत्वपूर्ण अहा। एह बरे मई तोहार आदर करबा मई तोहसे पिरम करत हँ, ताकि तू जी सका, अउर मोर होइ सका। एकरे बरे मई सबहिं मनइयन अउर जातियन क बदले में देबँ।”

यिर्मयाह 31:3 ‘मोहसे पराथना करा अउर मई तोहका देई। मई तोहका महत्वपूर्ण रहस्य बताउबा तू ओनका कबहुँ नाही सुन्या हा’

होसे 11:8 “हे एप्रैम, मई तोहका तजि देइ नाही चाहत हँ। हे इस्राएल, मई चाहत हँ कि मई तोहार रच्छा करँ। मई तोहका अदमा क तरह नाही कइ देइ चाहत हँ। मई नाही चाहत हँ कि तोहका सबोर्याम जइसा बनाइ देँ। मई आपन मन बदलत हँ तोहरे बरे पिरम बहोत गहिर अहइ।

यूहन्ना 3:16 परमेस्वर इ दुनिया स इतना पिरम करत रहा कि अपने एकलौता पूत क दइ दिहेस, जइसे कि ओहमाँ बिसवास करइवाला कउनो मनई क नास न होइ, ओका अनन्त जीवन मिल जाइ।

यसायाह 49:15,16 किन्तु यहोवा कहत ह, “का कउनो मेहरारू आपन ही बच्चन क भूल सकत ह नाहीं। का कउनो मेहरारू उ बच्चा क जउन ओकर ही कोख स जन्मा ह, भूल सकत ह नाहीं। सम्भव अहइ कउनो मेहरारू आपन सन्तान क बिसरि जाइ। परन्तु मई (यहोवा) तोहका नाहीं बिसरि सकत हउँ। 16 लखा जरा, मई आपन हथेली पइ तोहार नाउँ खोद लिहे हउँ। मई सदा तोहरे विसय मँ ही सोचा करत हउँ।

यसायाह 41:13 मई तोहार परमेस्सर यहोवा हउँ। मई तोहार सीधा हाथ थाम रखे हउँ। मई तोहसे कहत हउँ कि ‘जिन डेराउना मई तोहका सहारा देबा’

मती 28:20 उ सबइ हुकुम जउन मई तोहका दिहे हउँ, ओनका ओन प चलब सिखावा। अउर याद राखा इ सृस्टि क अंत ताई मई हमेसा तोहरे संग रहबा”

यूहन्ना 14:1 ईसू कहेस, “तू सबन्क परेसान न होइ चाही। परमेस्सर मँ बिसवास करा अउर मोरे मँ बिसवास बनाए रखा।

यसायाह 41:14 कीमती यहूदा, तू निर्भय रहा। हे मोर प्रिय इस्राएल क लोगो! भयभीत जिन रहा। फुरइ मई तोहका मदद देबउँ।” खुद यहोवा ही इ सबइ बातन कहे रहा। इस्राएल क पवितर परमेस्सर जउन तोहार रच्छा करत ह, कहे रहा:

यसायाह 43:2 जब तोहे पइ बिपतियन पड़त हीं, मई तोहरे संग रहत हउँ। जब तू नदी पार करब्या, तू बहब्या नाहीं। तू जब आगी स होइके गुजरब्या, तउ तू बरब्या नाहीं। लपटन तोहका नोस्कान नाहीं पहुँचइही।

भजन संहिता 23:1-6 यहोवा मोर गड़रिया अहइ। जउन कछू भी मोका अपेच्छित होइ, सदा मोरे लगे रही। 2 हरे भरे चरागाह मँ मोका सुख स उ राखत ह। उ मोका सांत झरनन पइ लइ जात ह। 3 उ आपन नाउँ क निमित्त मोरी आत्मा क नई सकी देत ह। उ मोर अगुआई करत ह कि उ फुरइ उत्तिम अहइ। 4 मई मउत क आँधिअर घाटी स गुजरत भइ नाहीं डेराब, काहेकि यहोवा तू मोरे संग अहा। तोहार चरवाहे क लाठी मोका सुख देत हीं। 5 हे यहोवा, तू मोरे दुस्मनन क समन्वा मोर खइया बरे मेज सजाया ह। तू मोरे मूँड़े पइ तेल उड़ेर्या ह। मोर कटोरा भरा ह अउ छलकत बाटइ। 6 निचहय नेकी अउ करुणा मोर बाकी जिन्नगी तलक मोरे संग रही। मई यहोवा क मन्दिर मँ लम्बी समइ तलक बार-बार जाबिउँ।

यूहन्ना 14:27 तू मोका कहत सुने अहा, ‘मई जात अहउँ अउर तोहरे लगे फिन

आउबा' जदि तू मोसे पिरेम करे होत्या तउ तू खुस होई जात्या, काहेकि मई परमपिता क लगे जात अहउं। काहेकि परमपिता मोसे बड़ा अहइ।

फिलिप्पियन 4:7 इही स परमेस्सर कइँती स मिलइवाली सान्ति, जउन समझ स परे बा तोहरे हिरदइ अउर तोहरे बुद्धि क मसीह ईसू में सुरच्छित बनाए रखी।

नीतिवचन 3:24 तोहका सोवइ पइ कबहुँ डर नाहीं खाहीं अउर सोइ जाए पइ तोहार नींद मधुर होइ।

भजन संहिता 4:8 मई बिछउना पइ ओलरत हउँ अउर सान्ति स सोवत हउँ। काहेकि यहोवा, तू ही मोका सुरच्छित कइके सोवइ बरे ओलारत ह।

भजन संहिता 33:18 जउन लोग यहोवा क अनुसरण करत हीं, ओनका यहोवा लखत ह अउ रखवारी करत ह। जउन मनई ओकर आराधना करत हीं, ओनका ओकर महान पिरेम बचावत ह।

रोमियन 5:2 उही क जरिये बिसवास क कारण ओकरे जउन अनुग्रह में हमार स्थिति बा, ओह तलक हमार पहुँच होइ गइ रही। अउर हम परमेस्सर क महिमा क कउनउ आसा पावइ क आनन्द लेइत ह।

यसायाह 55:12 “जब तू पचन्क आनन्द स भरिके सान्ति अउर एकता क साथ में उ धरती स छुड़ाइके लइ जावा जाइ रहा होइ जेहमाँ तू पचे बन्दी रह्या, तउ तोहरे पचन क समन्वा खुसी में पहाड़ फट पड़िहीं अउर थिरकइ लगिहीं। पहाड़ियन नाच में फूटि पड़िहीं। तोहार पचन्क समन्वा जंगल क सबहिं बृच्छ अइसे हलइ लगिहीं जइसे तालियन पीट रहा होइँ।

यूहन्ना 16:22 इ बरे तू पचे इ समइ वइसे दुःख अहा, मुला जब मई तोहसे फिन मिलबइ तउ तोहार दिल में आनन्द होई। अउर तोहार आनन्द तोहरे कउनो भी छीन न पाई।

लूका 12:9 मुला ज जउन मोका दुसरे क समन्वा न मानी, ओका परमेस्सर क दूतन क समन्वा इन्कार कइ दीन्ह जाइ।

मत्ती 10:30 अरे तोहरे मूँड़े क एक एक बार तक गिना भवा बाटइ।

यसायाह 54:10 यहोवा कहत ह, “चाहे पर्वत लुप्त होइ जाईं अउर इ पहाड़ियन रेत में बदल जाईं किन्तु मोर करुणा तोहका कबहुँ भी नाहीं तजी। मई तोहसे मेल करब अउर उ मेल क कबहुँ अंत न होइ।” यहोवा तोह पइ करुणा देखावत ह अउर उ यहोवा ही उ सबइ बातन बताएस ह।

मती 11:28-30 “अरे, ओ थका माँदा, बोझन स दबान मनइयन मोरे लगे आवा। मई तोहका सुख चइन देब। 29 मोर जुआ ल्या अउर आपन उपर धया। फिन मोसे सीखा काहेकि मई सहल हउँ अउर मोर मनवा कोमल अहइ। तोहका भी आपस बरे सुख-चइन मिली। 30 काहेकि उ जुआ जउन मई तोहका देइत ह बहोत सहल बाटइ। अउर उ बोझावा जउन मई तोह पर डारत अही, हल्का बाटइ।”

अ्रेष्ठगीत 2:10 मोर प्रियतम मोसे बोलेत ह: “हे मोर प्रिये, उठा, हे मोर सुन्नरी, आवा कहूँ चली।

होसे 2:14,19,20 “एह बरे, मई ओका लुभावइ बरे जात हउँ। मई ओका रेगिस्तान में लइ जाब अउर मई खुद ओह पइ जीतब। 19 मई तोहका सदा-सदा बरे आपन दुलहिन क रूप में लइ लेब। मई प्रतिग्या करत हउँ कि तोहका नेकी, खरेपन, पिरिम अउर दयालुता क संग आपन दुलहिन बनाइ लेब। 20 मई तोहका आपन बिस्सासी दुलहिन बनाइ लेब अउर मई तोहार बिस्सासी होइ बरे प्रतिग्या करब। तब तू सचमुच यहोवा क जान जाबू।”

निर्गमन 3:14 तब यहोवा मूसा स कहेस, “‘मई हउँ जउन मई हउँ’ जबहिं तू इस्राएलियन क लगे जाब्या, तब ओनका बताइ दिहा, ‘मई हउँ’, जउन मोका तोहरे लगे पठएस ह।”

होसे 13:4 “तू लोग जब मिस्र में भवा करत रह्या, मई तबहिं स तोहार परमेस्सर यहोवा अहउँ। मोका तजिके तू पचे कउनो परमेस्सर क नाहीं जानत रह्या। मोर इलावा तोहका कउनो नाहीं बचाइ सकत ह।

यूहन्ना 15:14 जउन आदेस तोहका मई देत अही, जदि तू ओन पइ चलत रहब्या तउ तू मोर मीत अह्या।

प्रकासित वाक्य 3:20 सुना, मई दरवाजे प खड़ा अहउँ अउर खटखटावत अहउँ। जउ केहू मोर आवाज सुनत ह अउर दरवाजा खोल देत ह तउ मई अन्दर आइ जइहउँ अउर ओकरे साथे बइठके खाना खाबइ। अउर उ मोर साथे बइठके खाना खात ह।